

आकाशवाणी जयपुर-अजमेर
प्रादेशिक समाचार
दिनांक 11.09.2024 समय: 18.45 बजे

- प्रधानमंत्री नरेन्द्र मोदी कह्यो-सरकार भारत ने सेमीकंडक्टर पावर हाउस बणावण सारू सगळा ज़रूरी जतन करेलां
- उद्योग अर वाणिज्य मंत्री कर्नल राज्यवर्द्धन राठौड़ कह्यो- 'राइजिंग राजस्थान' ग्लोबल इन्वेस्टमेंट समिट रे जरिए निवेश जुटावण माथे सरकार रो खास ध्यान
- राष्ट्रपति द्रौपदी मुर्मू बेहतरिन काम करण वाळा नर्सिंग कर्मचारियां ने राष्ट्रीय प्लोरेंस नाइटिंगेल पुरस्कार दे र नवाजां
- प्रदेश मांय केई ठौड़ां बिरखा रा समाचार- धौलपुर मांय लगातार बरसात ऊं जिन्दगी माथे असर पड़्यो-चंबल नदी मांय पाणी खतरा रा निशान रे करीब पूग्यो

000

प्रधानमंत्री नरेन्द्र मोदी कह्यो है के भारत सेमीकंडक्टर पावर हाउस बणावा सारू ज़रूरी हर जतन करेलां वे कह्यो के सरकार देश मांय बत्ती तादाद मांय चिप बणावण माथे खास ध्यान दे रही है ताकि हर डिवाइस मांय भारत मांय बणी चिप लगायी जा सकें वे आज ग्रेटर नोएडा मांय सेमीकॉन इंडिया 2024 रा उद्घाटन जळसा मांय बोल रह्या हां प्रधानमंत्री कह्यो के देश मांय इलेक्ट्रॉनिक्स अर सेमीकंडक्टर उद्योग ने बधावो देवण सारू भांत-भांत री कोशिसां करी जा रही हैं

000

राज्य सरकार प्रदेश मांय निवेश करण ने आसान बणावण सारू 21 नुवी नीतियां बणायी है अर जूनी नीतियां मांय बदलाव करी ज्या हैं पॉलिसी में संशोधन भी किया गया हैं उद्योग अर वाणिज्य मंत्री कर्नल राज्यवर्द्धन राठौड़ राइजिंग राजस्थान इन्वेस्टमेंट समिट रा बारा मांय आज जयपुर मांय खबरनवीसां सागे बातचीत करता थकां आ जाणकारी दीनीं वे कह्यो के राइजिंग राजस्थान इन्वेस्टमेंट समिट ऊं पैली परदेशां अर देश रा न्यारा-न्यारा शहरां मांय ई सम्मेलन राख्या जावेलां

राठौड़ कह्यो के 'राइजिंग राजस्थान' ग्लोबल इन्वेस्टमेंट समिट 2024 रे जरिये प्रदेश मांय निवेश जुटावण सारू सरकार खास जतन कर रही हैं वे कह्यो के प्रदेश मांय निवेश मांय बधोतरी ऊं नौजवानां ने फायदो मिलेलां राठौड़ कह्यो के निवेश ने असल मायना मांय हासिल करण सारू सरकार तैयारियां कीनी है अर केई आला अहलकारां ने न्यारा-न्यारा देशां अर राज्यां मांय रहवास करण वाळा निवेशकां सागे तालमेल बिठावण बाबत् प्वाइंट आफ कॉन्टैक्ट रा तौर ऊं लगायी ज्या हैं

'राइजिंग राजस्थान' ग्लोबल इन्वेस्टमेंट समिट जयपुर मांय 9, 10 अर 11 दिसम्बर ने करावण रो कार्यक्रम हैं

000

साइबर ठगी रा मामलां मांय केन्द्र सरकार दूर संचार विभाग रा पोर्टल 'दर्बीतेंजीप' माथे जनता सारू केई सुबीता मुहैया कराया हैं राज्य मांय साइबर अपराध रोकण रो काम देख रह्या पुलिस महानिदेशक हेमंत प्रियदर्शी बतायो के 'व्हाट्सएप मैसेज' या 'व्हाट्सएप रे जरिये फोन रे मार्फत दगाबाजी री शंका रा मामलां री शिकायत या जानकारी 'संचार साथी' पोर्टल माथे 'सिटीजन सेंट्रिक सर्विसेज' रा तैत 'चक्षु' लिंक माथे हिन्दी मांय ई दर्ज कराई जा सके हैं प्रियदर्शी बतायो

के चक्षु माथे रपट दर्ज व्ह्यां पाछे दूरसंचार विभाग जरूरी जांच-पडताल कर र शंका वाळा नम्बर ने बंद करण समेत दूजी जरूरी कार्यवाही करे हें वे बतायो के 'संचार साथी' पोर्टल माथे कोई ई आ जाणकारी कर सके है के ज्यां कागजात रा आधार ऊं वां रो 'मोबाईल नम्बर' चाल रह्यो है, वां ई कागजात रा आधार ऊं गलत तरीका ऊं कोई और दूजी सिम इस्तेमाल तो नहीं कर रह्यो हें

000

राष्ट्रपति द्रौपदी मुर्मू बेहतरीन काम करण वाळा नर्सा ने आज राष्ट्रपति भवन मांय राष्ट्रीय फ्लोरेंस नाइटिंगेल पुरस्कार दे र नवाजां राष्ट्रीय फ्लोरेंस नाइटिंगेल पुरस्कार साल 1973 मांय स्वास्थ्य अर परिवार कल्याण मंत्रालय कानी ऊं सरु करी ज्यो हों नर्सा अर नर्सिंग पेशेवरां कानी ऊं समाज री सराहवणा जोगी सेवा ने मान देवण सारु ओ ईनाम दियो जावे हें जयपुर रा सवाई मानसिंह अस्पताल मांय वरिष्ठ नर्सिंग अधिकारी राधे लाल शर्मा री सेवावां रो ई राष्ट्रपति राष्ट्रीय फ्लोरेंस नाइटिंगेल पुरस्कार दे र मान कीनों वे ई सारु सरकार रो धन्यवाद कीनों ध्यानजोग है के राधे लाल ट्रोमा केयर अर अंगदान समेत सेहत ऊं जुड्या न्यारा-न्यारा मुद्दां माथे जागरुकता कार्यक्रम ई चला रह्या हें

000

राज्यपाल हरिभाऊ बागडे आज जयपुर कने आमेर मांय महिषासुर मर्दिनी स्वरूप शिला माता रा दर्शन कीनां वे माता ऊं देश अर प्रदेश रा सुख, समृद्धि अर सम्पन्नता री प्रार्थना कीनीं राज्यपाल ऐतिहासिक आमेर किला रा दीवान-ए-आम, शीश महल, केसर क्यारी, 27 कचहरी, गणेश पोळ अर मैजिकल फ्लावर समेत न्यारी-न्यारी ठौडां ने निरखीं वे आमेर किला रा शिल्प सौंदर्य अर वास्तु विज्ञान ने घणो खास बताता थकां पाणी बचावण री सीख लेवण री अपील कीनीं राज्यपाल कह्यो के यूनेस्को विश्व विरासत री लिस्ट मांय शामिल आमेर रो किलो राजस्थान ही नहीं बल्कि पूरा देश री शान हें वे किला री परशियन, मुगल अर हिंदू शैली रा मेहराब, गुम्बद अर शिखर री सराहवणा कीनीं

000

प्रदेश मांय न्यारी-न्यारी ठौडां आज ई बिरखा व्हेवण रा समाचार हें धौलपुर जिला मांय काल रात ऊं व्हे रही बारिश ऊं न्यारा-न्यारा गेला माथे पाणी भर ग्यो है, जिण ऊं आवण-जावण मांय परेशानी व्हे रही हें जिला रा आंगई बंधा रा छह दरुजा खोल र बत्तो पाणी पार्वती नदी मांय छोड्यो जा रह्यो हें जिला प्रशासन पार्वती नदी रे आरे-सारे बस्योडा गांवां मांय हाई अलर्ट रो ऐलाण कीनो हें हाडौती अंचल मांय लगातार बारिश रे कारण चंबल नदी मांय ई पाणी खतरा रा निशाण रे करीब पूग ग्यो हें प्रशासन नदी री कोर कने बस्योडा करीब 50 गांवां मांय हाई अलर्ट रो ऐलाण कर र एस.डी.आर.एफ. री टीमां तैनात कीनी हें सवाईमाधोपुर मांय आज आपदा प्रबंधन अर सहायता अर नागरिक सुरक्षा मंत्री डॉ. किरोड़ी लाल मीणा हालात रो जायजो लीनो अर अहलकारां ने जरूरी हुकम दीनां जयपुर रा केई हलकां मांय ई आज संवारे जोरदार मेह बरस्यो बांसवाडा मांय व्ही मूसलाधार बारिश ऊं नदी-नाळां मांय पाणी उफण रह्यो हें पाली अर सवाईमाधोपुर मांय ई चोखी बिरखा व्हे रही हें मौसम विभाग प्रदेश रा ऊगणी जिलां मांय आवता तीन-चार दिन चौमासा री बिरखा व्हेवण रा आसार जताया हें आज कोटा अर भरतपुर संभाग मांय कटे-कटे भारी ऊं घणी भारी बारिश रा आसार हें जयपुर, अजमेर अर उदयपुर संभाग मांय ई कटे-कटे भारी बारिश रा आसार हें

000

शिक्षा मंत्री अर जोधपुर जिला रा प्रभारी मदन दिलावर आज जोधपुर मांय जनसुणवाई कीनीं वे जनता री परेशानियां सुण र अहलकारां ने वां रा निपटारा रा हुकम दीनां ई मौके दिलावर कह्यो के राज्य सरकार जनसुणवाई रे मार्फत जनता री समस्यावां ने तेजी ऊं निपटावण रो काम कर रही हें दिलावर जोधपुर, जोधपुर ग्रामीण अर फलौदी री जनता री समस्यावां सुणीं

000

जयपुर जिला रा प्रभारी मंत्री जोगाराम पटेल अहलकारां ने जमीं रा आवंटन समेत न्यारी-न्यारी जरूरी प्रक्रिया बेगी ई पूरी करण रा हुकम दीना हें वे आज बजट मांय करी ज्या ऐलाण रा बारा

मांय अहलकारां सागे राख्यी ज्यी मीटिंग मांय बोल रह्या हां पटेल अहलकारां ने शहर मांय पाणी री निकासी री व्यवस्था मजबूत बणावण , यातायात व्यवस्था ने बेहतर बणावण अर सडकां री मरम्मत करावण रा हुकम ई दीनां

000

सीकर ज़िला रा दांतारामगढ कने मेंई गांव मांय होद री खुदाई रे दौरान मिट्टी ढस जावण रे कारण तीन जणा री मौत व्हे गयीं मरण वाळा एक ही पिरवार रा हां पुलिस गांवां वाळां री मदद ऊं वां ने निकाळ र दांता सी.एच.सी. पूगाया, जठे डॉक्टर वां रे जीवता नी व्हेवण री जाणकारी दीनीं

000

डूंगरपुर मांय कृषि विभाग री ओर ऊं आज जिला स्तर रो कृषक संवाद कार्यक्रम राख्यी ज्यों ई दौरान राजस्थान किसान आयोग रा अध्यक्ष सी आर चौधरी अर प्रभारी मंत्री बाबूलाल खराडी किसानां सागे बातचीत कीनीं वे किसानां री समस्यावां सुण र वां री राय लीनी अर उन्नत खेती सागे आमदनी मांय बधोतरी रा बारा मांय चर्चा कीनीं

000